



Sumáriu Kazu
Tribunál Distritál Dili
Marsu 2021

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 12

Artigu sira	Tipu kazu	Númeru
Artigu 145 Kódigu Penál (KP) & artigu 2, 3 no 35(b) Lei Kontra Violénsia Doméstika (LKVD).	Ofensa ba integridade física simples ho natureza violénsia doméstika no tipu ilízitu sira kona-ba violénsia doméstika nian.	6
Artigu 145 KP konjuga ho artigu 2, 3, 35(b) LKVD, Artigu 183 & artigu 174 KP	Ofensa ba integridade física simples ho natureza violénsia doméstika no tipu ilízitu sira kona-ba violénsia doméstika nian, devisa no explorasaun seksuál ba ema seluk	1
Artigu 142 Kódigu Penál	Infantisídiu	1
Artigu 172 Kódigu Penál	Violasaun seksuál	1
Artigu 177 Kódigu penál	Abuzu seksuál ba menór	1
Artigu 178 Kódigu penál	Aktu seksuál ba adolexente	1
Artigu 303 nú 1(a) & Artigu 304 KP	Falsifikasaun dokumentu ka notasaun téknika no falsifikasaun agravada	1
Total		12

1. Totál desizaun ne'ebé JSMP monitoriza: 8

Tipu desizaun	Númeru
Pena multa (Artigu 67 KP) no Suspensaun ba prizaun nia ezekusaun (Artigu 68 KP) no absolve	1
Pena multa (Artigu 67 KP)	2
Suspensaun ba prizaun nia ezekusaun (Artigu 68 KP)	5
Total	8

2. Totál kazu sira ne'ebé adia tuir JSMP nia monitorizasaun: 0

3. Totál kazu ne'ebé sei kontinua prosesu tuir JSMP nia monitorizasaun: 4

B. Deskrisaun sumáriu ba desizaun kazu sira ne'ebé JSMP monitoriza:

1. Krime aktu seksuál ho adolexente

Nú. Prosesu : 0080/20 DINFT
Kompozisaun Tribunál : Singulár
Juis : Dr. Ivan José Suritay Patrocínio Antonino Gonçalves
Prokuradór : Dr. Luis Hernani Rangel
Defeza : Dr. Juvinal Yanes
Desizaun : Pena prizaun tinan 2 suspende ba tinan 2

Iha 05 Marsu 2021 Tribunál Distritál Dili prezide julagamentu leitura sentensa ba krime aktu seksuál ho adolexente ne'ebé envolve arguidu ABS hasoru lezada NMM (eis namorada), iha Munisípiu Dili.

Akuzasaun Prokuradór

Prokuradór akuza katak iha 25 Juñu 2020, iha oras tuku 13:39 meiodia, arguidu lori lezada ba arguidu nia fatin faan roupa nian, to'o iha ne'ebá arguidu lori lezada ba nia kuartu laran no xave kedas odamatan kuartu nian, hafoin arguidu hatete ba lezada dehan *'agora ita halo relasaun seksuál* no lezada mós hatan dehan *di'ak* maibé lezada sente ta'uk no dehan tan ba arguidu katak *"loron ruma lezada hola mane, ema sei insulta lezada"* maibé arguidu hatan fali ba lezada dehan *hau halo relasaun seksuál ho ó, hau sei responsável ba hau nia hahalok ne'e*, nune'e lezada mós konkorda halo relasaun seksuál ho arguidu. Tuir mai lezada nahe kamizola ida iha rai hafoin arguidu ho lezada ida-idak hasai sira nia roupa, depois lezada toba iha kamizola ne'ebé nahe ona iha rai nia leten no arguidu ho lezada halo relasaun seksuál to'o ezakula maibé bainhira ezekula arguidu dada sai nia orgaun seksuál no ezekula iha lezada nia isin loloon.

Antes ne'e, arguidu telefone ba lezada no husu lezada atu bá hasoru arguidu, maibé lezada hatan ba arguidu katak "nia osan laiha atu selu mikrolete", maibé arguidu insiste nafatin no dehan ba lezada katak *mai de'it, depois hau selu mikrolete*. Nune'e lezada bá hasoru arguidu, bainhira lezada to'o arguidu hein ona iha terminál no bolu lezada bá iha arguidu nia fatin faan roupa nian no halo relasaun seksuál.

Arguidu satisfas tiha nia vontade seksuál no fó osan US\$ 2.00 ba lezada hodi sosa modo no lezada fila bá nia uma, iha momentu akoentesementu ne'e lezada foin halo tinan 14 fulan 6, arguidu nu'udar mane primeiru ne'ebé halo relasaun seksuál ho lezada no hasai lezada nia virgindade.

Prokuradór akuza arguidu kontra artigu 178 KP kona-ba aktu seksuál ho adolexente ho moldura penál to'o tinan 5 prizaun.

Produsaun ba prova sira

Iha julgamentu arguidu konfesa katak faktu sira iha akuzasaun ne'e loos hotu no haktuir katak arguidu koñese lezada tanba antes ne'e arguidu faan telemóvel no lezada ba sosa telemóvel iha arguidu, nune'e arguidu ho lezada koñese malu no iha relasaun namora, arguidu deklara katak arguidu kontaktu lezada husi telefone bei-beik hodi ko'alia kona-ba domin nian no ikus mak hasoru malu iha data akontesimentu no halo relasaun seksuál. Arguidu deklara katak nia la husu kona-ba lezada ninia tinan maibé arguidu haree lezada hanesan ema ho idade 20 ka 21 ona mak arguidu halo relasaun seksuál ho lezada. Arguidu deklara katak se nia hatene lezada sei menór mak arguidu sei la halo relasaun seksuál ho lezada, arguidu halo relasaun seksuál dala ida de'it ho durasaun lalais, depoisde akontesementu rezolve ona tuir família no arguidu fó sala ba lezada ho nia família sira ho osan US\$ 1,500.00 tanba sira sei iha relasaun família.

Alende ne'e, lezada konfirma faktu sira iha akuzasaun no konfirma mós ho arguidu nia deklarasaun katak depoisde akontesementu arguidu ho lezada nia família tuur hamutuk no rezolve ona problema ne'e maibé fó osan hira lezada la hatene, lezada mós deklara katak koñese arguidu nu'udar nia eis namoradu no antes ne'e lezada ba kompras mak arguidu bolu lezada hodi husu lezada nia número telemóvel, nune'e lezada koñese arguidu no iha momentu ne'ebá arguidu husu atu namora ho lezada no lezada mós konkorda hodi sira nain rua namora no iha data akontesementu foin arguidu kontaktu ba lezada hodi haruka lezada bá hasoru arguidu, nune'e lezada ba hasoru hodi sira halo relasaun seksuál.

Tribunál decide hodi la rona tan testemuña ninia deklarasaun tanba arguidu konfesa integralmente no lezada mós konfirma.

Alegasaun finál

Prokuradór haktuir katak arguidu konfesa ba faktu sira hotu iha akuzasaun. Arguidu konfensa katak arguidu halo duni relasaun seksuál maibé sira nain rua halo relasaun

seksuál ho konsentementu. Prokuradór konklui katak arguidu ninia hahalok ne'e priende duni rekeztu krime ne'e tanba arguidu uza nia esperénsia hodi halo relasaun seksuál ho lezada ne'ebé sei menór no seidak iha esperénsia, nune'e husu ba tribunál atu kondena arguidu tuir artigu 178 KP.

Entretantu parte defeza husu ba tribunál atu aplika pena ne'ebé mak justu ba arguidu no husu atu tribunál haree didi'ak deklarasaun no konsidera ba sirkunstánsia atenuante sira hotu hanesan arguidu konfesa katak sira nain rua halo relasaun seksuál ne'e hakarak ho hakarak , maibé lezada ema ne'ebé sei inosente hela, nomós depoisde akontesementu família rua konsília ba malu, dame no rekuperadu ona.

Desizaun

Depoisde avalia faktu sira hotu, tribunál prova katak arguidu halo duni relasaun seksuál ho lezada, iha momentu akontesementu lezada nia tinan 14 fulan 6 bazeia ba lezada nia sertidaun batizmu no relatóriu médiku ne'ebé mak junta iha autu. Tribunál tetu mós sirkunstánsia atenuante sira hanesan arguidu foin primeiravés mai hatan iha tribunál, depoisde akontesementu rezolve ona tuir família, arguidu promete sei la komete tan iha futuro, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

2. Krime ofensa ba integridade física simples ho natureza violência doméstica, devasa no explorasaun seksuál ba ema seluk

Nú. Prosesu : 0127/19 PNSIC
Kompozisaun Tribuná : Koletivu
Juis : Dra. Maria Solana Dra. Ana Paula Fonseca no Dr. Ivan José Suritay Patrocínio Antonino Gonçalves
Prokuradór : Dra. Ivonia Guterres no Dr. Nelson de Carvalho (subtitui malu)
Defeza : Dr. Sergio Dias Quintas
Desizaun : Pena multa US\$45.00, Pena prizaun tinan 3 suspende ba tinan 3 fulan 6 no absolve.

Iha 05 Marsu 2021, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violência doméstica, devasa no leitura akordaun ba krime explorasaun seksuál ba ema seluk ne'ebé envolve arguidu NPGdR hasoru nia feen (separadu), iha Munisípiu Dili.

Akuzasaun Prokuradór

Prokurador akuza katak iha 08 Juñu 2019, iha oras tuku 04:00 madrugada, iha sira nia uma, arguidu basa dala barak iha lezada nia hasan parte loos no karuk, tuku iha lezada nia kotuk laran, halo lezada nia oin nakukun, monu ba rai no tuku tan lezada. Antes ne'e arguidu ho kondisaun lanu husu osan US\$5.00 ba lezada atu hola tua ba hemu, maibé lezada dehan "*osan laiha*". Aktu ne'e rezulta lezada sofre moras, bubu no metan iha hasan parte loos, karuk no kotuk laran no lezadaba halo tratamentu iha sentru saúde Lanud Bairro Pite.

Tuir mai iha loron no oras ne'ebé la apura iha 2019, iha fatin hanesan, arguidu ho lezada halo relasaun seksuál no arguidu rasik mak hasai sira nia fotografia hodi pública iha *facebook* hodi ema hotu-hotu haree.

Durante lezada ho arguidu moris hamutuk, bainhira sira nia osan laiha, arguidu obriga,ameasa no haruka lezada ba buka osan ho maneira faan-an hanesan halo vida prostituta iha otél ne'ebé mak lokaliza iha Bairro Pite. Bainhira lezada hala'o nia vida hanesan prostituta, lezada rasik mak ba iha otél sira ne'e no arguidu tula lezada dala ida no arguidu rasik mak telefone ba mane ida hodi halo relasaun seksuál ho lezada hafoin mane ne'e selu osan ho montante US\$50.00 ba lezada. Husi lezada nia aktividade ne'e, lezada sempre simu osan ho montante US\$50.00 kada ema ida, bainhira lezada simu osan husi ema sira ne'e, lezada tenke entrega hotu osan ne'e ba arguidu, hafoin arguidu fó fali US\$5.00 ba lezada no arguidu lori osan sira ne'e ba hemu tua ho nia maluk mane sira.

Arguidu nia aktu hodi pública fotografia lezada nian bainhira halo relasaun seksuál ne'e hanesan meu ida kontra lezada nia vontade no arguidu mós iha intensaun atu hetan lukru husi aktividade prostituta husi lezada nian hodi fasilita arguidu nia hakarak.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2(a) 3(a), 35(b) no 36 husi LKVD, artigu 183 KP kona-ba devasa ho moldura penál to'o tinan 1 ka multa no artigu 174 (1) KP kona-ba explorasaun seksuál ba ema seluk ho moldura penál tinan 3 to'o tinan 10.

Produsaun ba prova sira

Iha julgamentu arguidu deklara katak kona-ba agresaun ne'e loos hotu, maibé kona-ba públikasaun fotografia iha *faceebok* ne'e la'os arguidu mak pública maibé ema seluk tanba depoisde halo relasaun seksuál liu semana tolu hanesan ne'e arguidu nia telemóvel lakon no liu loron ida hanesan ne'e mak ema pública fotografia iha *facebook*. Arguidu mós deklara katak iha momentu akontesimentu ne'e arguidu ho lezada hanesan feen ho la'en, sira moris hamutuk durante fulan ualu ne'e lezada sai ba otél dala neen, arguidu mós deklara katak antes ne'e lezada halo vida hanesan prostituta ona no arguidu tula duni lezada ba otél dala ida tanba lezada mak husu ajuda ba arguidu no bainhira lezada fila mai entrega osan US\$50.00 ba arguidu depois mak arguidu fó fali US\$5.00 ba lezada. Arguidu mós deklara katak dala ruma arguidu haree mane seluk tula lezada ho motorizada maibé kuandu fila ba uma arguidu nonook de'it, nomós hela separadu durante tinan rua ona, iha momentu ne'ebá lezada dehan atu ba nia kolega no la fila to'o agora.

Tribunál la rona lezada ninia deklarasaun tanba la konsege hetan lezada ninia paradeiru nune'e la konsege notifika lezada.

Alegasaun Finál

Prokuradór haktuir katak iha julgamentu la konsege rona lezada tanba lahatene lezada nia paradeiru, maibé iha primeiru interagatóriu perante prokuradór, arguidu ho lezada

presta deklarasaun nune'e prokurador husu ba tribunál atu konsidera ba faktu hotu nomós deside tuir prova sira hotu hodi fó pena ne'ebé justu no adekuaudu ba arguidu.

Entretantu parte defeza mós konkorda ho prokurador nia alegasaun hodi husu mós pena ne'ebé justu no adekuaudu ba arguidu tanba bazeia ba prova ne'ebé iha defeza entende katak faktu ne'ebé hetan iha julgamentu mak arguidu nia deklarasaun, arguidu konfesa kona-ba ofensa nia halo duni maibé kona-ba devasa no explorasaun seksuál ba ema seluk laiha prova ruma ne'ebé hatudu nomós iha produsaun ba prova la rona lezada.

Desizaun

Depoisde avalia faktu sira hotu, tribunál prova katak arguidu basa dala barak iha lezada nia hasan perte loos no karuk, tuku iha kotuk laran halo lezada nia oin nakukun, monu ba rai no tuku tan hasoru lezada. Tribunál mós prova katak arguidu iha konsentimentu lezada halo vida prostituta tanba ne'e arguidu lori lezada dala ida ba iha otél. Tribunál mós tetu ba sirkunstánsia atenuante sira hanesan arguidu konfesa ba faktu, arrepende no promete sei la komete tan nia hahalok iha futuro nune'e tribunál konklui prosesu ne'e no kondena arguidu ba krime ofensa ba integridade fízika simples ho natureza violénsia doméstika ho pena multa US\$45.00, ne'ebé arguidu sei selu US\$1.00 kada loron durante loron 45. Tribunál mós fiksa pena alternativa durante loron 30 iha prizaun bainhira arguidu la selu pena multa refere.

Kona-ba krime explorasaun seksuál ba ema seluk, tribunál kondena arguidu ho pena prizaun tinan tolu, suspende ba tinan tolu fulan neen. Enkuantu kona-ba krime devasa tribunál absolve arguidu husi krime ne'e tanba tribunál la prova katak durante arguidu ho lezada halo relasaun seksuál, arguidu hasai fotografia no públika iha *facebook*.

Alende ne'e tribunál mós fó adverténsia ba arguidu katak arguidu nia aktu baku no tula lezada ba husik iha otél ne'e lei bandu mezmu lezada rasik hakarak, tanba ne'e tribunál husu atu iha futuro kuandu ema ruma haruka arguidu atu tula ba otél karik lalika tula ona.

3. Krime ofensa ba integridade fízika simples ho natureza violénsia doméstika

Nú. Prosesu	: 0043/20 LIBZT
Kompozisaun Tribunál	: Singulár
Juis	: Dr. Argentino Luísa Nunes
Prokurador	: Dr. Luis Hernani Rangel
Defeza	: Dr. Sebastião Amadio Batista
Desizaun	: Pena prizaun fulan 3 suspende ba tinan 1

Iha 05 Marsu 2021 Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BN hasoru nia feen, iha Munisípiu Likisá.

Akuzasaun Prokuradór

Prokuradór akuza katak iha 15 Marsu 2020, iha oras tuku 08:00 dadeer, iha arguidu ho lezada nia hela fatin, arguidu tebe dala ida iha lezada nia kanotak, tuku dala rua iha lezada nia ulun, lori au pedasuk baku dala rua iha lezada nia kotuk laran. Antes ne'e lezada sunu hela ahi iha dapur laran no arguidu tama ba husu lezada dehan "*ó mak estraga hau nia telefone?*" husi ne'e arguidu ho lezada diskute malu no arguidu halo agresaun refere hasoru lezada. Arguidu nia aktu ne'e rezulta lezada sofre moras iha kanotak, ulun no kotuk larann lezada ba halo tratamentu iha sentru saúde Likisá.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2(a), 3(b), 35(b) no 36 LKVD.

Produsaun ba prova sira

Iha julgamentu arguidu deklara katak faktu sira iha akuzasaun ne'e loos hotu. Arguidu tebe dala ida iha lezada nia hirus matan, tebe dala ida iha kanotak, basa dala rua iha kotuk laran no uza au pedasuk (au fera) baku dala rua iha lezada nia ulun, arguidu rekoñese katak nia aktu ne'e la di'ak no lei bandu. Arguidu deklara katak depoisde akontesementu to'o agora sira hela separadu, maibé arguidu nafatin hadomi lezada no hakarak atu moris hamutuk ho lezada hanesan feen ho la'en.

Alende ne'e, lezada deklara katak iha momentu ne'ebá sira diskuti malu kona-ba telemóvel mak arguidu tebe dala ida iha kanotak, uza au fera baku dala rua iha lezada nia kotuk laran no tuku dala rua iha ulun, depoisde akontesementu lezada ba halo tratamentu iha sentru saúde Likisá no ba hela ho nia família to'o agora tanba arguidu la ba buka lezada ho nia oan hodi husu deskulpa, lezada sei hadomi arguidu no hakarak kontinua moris hamutuk ho arguidu hanesan feen ho la'en.

Depoisde produsaun ba prova, tribunál entende katak arguidu ho lezada sei hadomi malu no hakarak kontinua moris hamutuk nu'udar feen ho la'en, nune'e tribunál haruka arguidu husu deskulpa públiku ba lezada no lezada mós fó perdaun ba arguidu nomós husu atu arguidu lalika komete tan iha futuru.

Tribunál decide hodi la rona tan testemuña ninia deklarasaun tanba arguidu konfesa ba faktu sira hotu no lezada mós konfirma.

Alegasaun finál

Prokuradór haktuir katak arguidu konfesa katak nia halo duni agresaun hasoru lezada, arguidu nia aktu grave mak depoisde akontesementu kuaze besik tinan ida lezada ba hela ho nia família no arguidu la buka tuir lezada ho nia oan sira no to'o ona iha tribunál foin di'ak malu, maibé atu halo prevensaun iha futuru, prokuradór husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu aplika pena multa maibé tribunál iha hanoin seluk mak parte defeza husu pena ne'ebé justu no adekuaudu tanba arguidu konfesa ba faktu sira hotu no lezada mós konfirma.

Desizaun

Depoide avalia faktu sira hotu, tribunál prova katak arguidu tebe dala ida iha lezada nia knosen parte loos, tebe dala ida iha hirus matan, ka'er au pedasuk baku iha ulun, basa dala rua iha ulun hodi halo bubu no moras no lezada ba halo tratamentu iha sentru saúde Likisá, tribunál mós tetu sirkunstánsia atenuante sira hanesan arguidu foin primeiravés mai hatan iha tribunál, perante tribunálarguidu husu deskulpa ba lezada no lezada mós perdua ona arguidu, arguidu ho lezada kontinua moris hamutuk hanesan feen ho la'en, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

4. Krime ofensa ba integridade fízika simples ho natureza violénsia doméstika

Nú. Prosesu : 0190/19 DICMR
Kompozisaun Tribunál : Singulár
Juis : Dr. Álvaro Maria Freitas
Prokuradora : Dra. Angelina Saldanha
Defeza : Dra. Agostinha de Oliveira
Desizaun : Pena prizaun fulan 4 suspende ba tinan 2

Iha 08 Marsu 2021 Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CM hasoru nia feen, iha Munisípiu Dili.

Akuzasaun Prokuradora

Prokuradora akuza katak iha 06 Abril 2019, iha oras tuku 14:00 lokraik iha arguidu ho lezada nia uma, arguidu tuku dala ida iha lezada nia ulun parte karuk no sai ba trata aat lezada nia maun tanba iha momentu ne'ebá lezada nia maun rasik ba vizita lezada no lezada sei konversa ho nia maun no nia kuiñada, derrepente lezada nia oan feto hadeer mai no husu bee iha lezada nune'e lezada tama ba uma laran fui bee fó labarik mak arguidu husu ba lezada dehan "*ó konta hau ka?*", no lezada mós hatan dehan "*lójika ne'e iha ne'ebé mak hau konta ó ba hau nia maun rasik*" nune'e arguidu hamri'ik hodi halo agresauun hasoru lezada.

Arguidu nia aktu ne'e ba dala rua ona, antes ne'e iha Abril 2018 arguidu lori kadeira baku dala ida iha lezada nia liman parte karuk ne'ebé rezulta lezada sofre moras iha ulun parte karuk no liman parte karuk maibé la ba halo tratamentu saúde.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2(a), 3(b), 35(b) no 36 LKVD.

Produsaun ba prova sira

Iha julgamentu arguidu deklara katak iha 2018 arguidu uza kadeira baku duni dala ida iha lezada nia liman tanba arguidu ko'alia lezada la rona no iha 06 abril 2019 arguidu kaer lezada nia fuuk rasta la'os tuku, tanba arguidu deskonfia lezada konta arguidu ba nia maun, depoisde akontesimentu lezada ba hela iha nia maun sira durante fulan rua depois arguidu ba lori fila lezada hodi kontinua moris hamutuk hanesan feen ho la'en to'o agora, arguidu foin primeiravés mai hatan iha tribunál, arrepede ninia hahalok no promete sei la komete tan hahalok ne'e iha futuru.

Alende ne'e, lezada mós konfirma ba faktu sira iha akuzasaun katak iha momentu akontesementu arguidu tuku dala ida iha lezada nia ulun la'os rasta lezada nia fuuk, , lezada mós konfirma ho arguidu nia deklarasaun katak depoisde akontesimentu lezada ho nia oan sai husi uma ba hela ho nia maun sira durante fulan rua maibé arguidu sempre ba vizita hela de'it no lori fila lezada ho nia oan ba moris hamutuk fali hanesan feen ho la'en no mós lezada perdua ona arguidu.

Alegasaun finál

Prokuradora haktuir katak arguidu konfesa integralmente ba faktu sira hotu iha akuzasaun, mezmú arguidu dehan rakut maibé efeitu husi agresaun ne'e tanba halo moras ema nia isin, haree ba sirkunstánsia sira hanesan arguidu konfesa, arrepede nia hahalok, depoisde akontesementu liu fulan rua arguidu lori fali nia feen ho oan ba hela hamutuk fali, nune'e atu eduka arguidu no komidade nune'e husu ba tribunál atu kondena arguidu ho pena multa ne'ebé fiksa tuir arguidu nia rendimentu.

Entretantu parte defeza mós konkorda ho prokuradora nia alegasaun ne'ebé husu pena multa bazeia ba arguidu nia ekonomia tanba arguidu konfesa integralmente ba faktu mezmú rakut iha fuuk mós prejudika moras isin no lezada mós konfirma. Iha 2018 arguidu uza kadeira baku iha lezada nia liman, arguidu arrepede niania hahalok, promete sei la komete tan iha futuru no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak iha Abril 2018 arguidu lori kadeira ida hodi baku iha lezada nia liman parte karuk no iha 06 abril 2019 arguidu tuku dala ida iha lezada nia ulun patre karuk. Tribunál tetu mós sirkunstánsia atenuante sira hanesan arguidu primeiravés mai hatan iha tribunál, arrepede ninia hahalok no promete sei la komete tan iha futuru, nune'e tribunál konklui prosesu ne'e no kondena arguidu ho pena prizaun fulan haat suspende ba tinan rua. Tribunál mós bazeia ba artigu 100 KPP kona-

ba desizaun ne'ebé la hatama iha rejistu kriminal nune'e la rejistu iha arguidu nia sertidaun kriminal tanba arguidu hanesan funsionáriu públiku.

5 Krime ofensa ba integridade física simples ho natureza violénsia doméstika

Nú. Prosesu : 0090/20 DICMR
Kompozisaun Tribunál : Singulár
Juis : Dr. Evangelino Belo
Prokuradór : Dr. Jacinto Babo
Defeza : Dr. Marito da Silva (advogadu privadu)
Desizaun : Pena multa US\$30.00 no kustu US\$10.00

Iha 11 Marsu 2021 Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu VMdS hasoru lezada (oan enteada), iha Munisípiu Dili.

Akuzasaun Prokuradór

Prokuradór akuza katak iha 20 Feveireiru 2020, iha oras tuku 08:00 dadeer, iha arguidu ho lezada nia hela fatin, arguidu basa dala ida iha lezada nia hasan parte karuk halo lezada monu tun ba rai. Aktu ne'e rezulta lezada sofre moras iha nia hasan parte karuk nomós la ba halo tratamentu saúde. Antes ne'e lezada hamoos hela modo no ko'alia halimar ba arguidu katak "*horseik ama duni ó maibé ó lakohi sai*. Arguidu lasimu no halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2(a), 3(c), 35(b) no 36 LKVD.

Produsaun ba prova sira

Iha julgamentu arguidu deklara katak iha momentu ne'ebá lezada ko'alia ba arguidu katak *horseik ama duni ó maibé ó lakohi sai*, nune'e arguidu hirus no hatan lezada dehan *ó labarik ki'ik-oan labele atu hatene ami rua ama nia problema* maibé arguidu rezeita katak nia la basa lezada. Arguidu mós deklara katak iha momentu ne'ebá lezada kontaktu ba nia maun no lezada nia maun lori lezada ba apresenta keixa iha polisia Eskuadra Becora, depoisde akontesimentu di'ak malu fali ona, lezada hela nafatin ho arguidu, arguidu arrepende ninia hahalok, foin primeiravés mai hatan iha tribunál no depoisde akontesementu la mosu tan problema seluk nomós arguidu mak sustenta ba família.

Entretantu lezada konfirma akuzasaun no haktuir katak iha momentu akontesementu lezada nia prima BMdS mak haree no lezada konta ba nia prima Ilda nune'e lezada nia prima Ilda kontaktu ba lezada nia maun no lezada nia maun lori lezada ba apresenta keixa iha Polisia eskuadra Becora. Lezada mós deklara katak depoisde akontesementu

lezada hela hamutuk nafatin ho arguidu, la mosu tan problema seluk, arguidu foin primeiravés halo agresaun hasoru lezada nomós arguidu mak sustenta lezada.

Entretantu testemuña BMdS nu'udar arguidu nia alin hili direitu nonook. Nune'e mós testemuña EdS nu'udar arguidu nia feen hili ninia direitu nonook maibé deklarata katak durante ne'e arguidu mak sustenta sira nia família no lezada nu'udar nia oan nune'e testemuña ta'uk ko'alia sala.

Alegasaun finál

Prokuradór haktuir katak arguidu nega katak nia la basa lezada no iha momentu ne'ebá arguidu ko'alia de'it, mezmu nune'e lezada mai tenta atu bosok kona-ba arguidu basa lezada dala ida no ikus dehan basa duni dala ida, depoisde akontesimentu di'ak malu fali, la komete tan ona agresaun hasoru lezada nomós lezada mós konfirma kona-ba arguidu mak sustenta família uma laran nune'e husu ba tribunál atu aplika pena multa ba arguidu.

Entretantu parte defeza husu ba tribunál atu aplika pena ne'ebé adekua ba arguidu tanba arguidu nega la basa lezada maibé lezada konfirma, lezada nia maun lori lezada ba hato'o keixa, fila ba uma lezada hela nafatin ho arguidu to'o agora, arguidu mak sustenta lezada no família. Alende ne'edefeza husu atu arguidu lalika selu kustu judisiariu tanba arguidu hetan asisténsia husi advogadu privadu maibé provonu de'it.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan parte karuk, tribunál tetu mós sirkunstánsia atenuante sira hanesan arguidu arrenpende nia hahalok, di'ak malu ona, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00, ne'ebé arguidu sei selu US\$0.50 kada loraun durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere. Nomós tribunal fiksa kustu judisiáriu US\$ 10.00 tanba arguidu hetan asisténsia husi advogadu provadu.

6. Krime infantisídiu

Nú. Prosesu	: 0024/19 PNSIC
Kompozisaun Tribunál	: Koletivu
Juis	: Dr. Argentino Nunes, Dr. José Gonçalves no Dr. Álvaro Maria Freitas
Prokuradór	: Dr. Hipolito Exposto Martins Santa
Defeza	: Dr. Manuel Sarmiento
Desizaun	: Pena prizaun tinan 3 suspende ba tinan 4

Iha 16 Marsu 2021, Tribunál Distritál Dili prezide julgamentu leitura akordaun ba krime infantisídiu ne'ebé envolve arguida MEX hasoru nia oan (bebé), iha Munisípiu Dili.

Akuzasaun Prokuradór

Prokuradór akuza katak iha 28 Janeiru 2019, iha oras tuku 10:00 dadeer, arguida sente nia kanotak no kabun moras iha kuartu laran. Iha oras hanesan testemuña AdJM (arguida nia inan kiik) tein hela sasoro iha dapur laran haree arguida tama ba haris fatin derrepente testemuña haree husi odamatan okos haris fatin nian, ran fakar barak loos, nune'e testemuña fó hatene ba Izd nu'udar arguida nia maun no testemuña MPX (arguida nia prima) haruka bolu arguida atu loke odamatan maibé arguida la loke odamatan, nune'e arguida nia maun tebe odamatan nakloke haree ran fakar barak no laiha bebé iha haris fatin laran, nune'e testemuña lori lipa ida fó hatais arguida no bolu taxi lori arguida ba halo tratamentu iha klínika Comoro. Bainhira to'o iha klínika parteira ho naran ECR haree katak arguida foin partu hotu no husu tuir bebé iha ne'ebé nune'e testemuña sira hakfodak katak arguida durante ne'e isin rua.

Bainhira parteira husu katak bebé iha ne'ebé, arguida bosok no hatan katak nia mens mai mak halo ran fakar barak no oin halai, nune'e testemuña MPX husu fali mak arguida foin hatete nia partu no bebé nia tau hela iha balde iha haris fatin laran. Hafoin parteira ne'e haruka kedas testemuña MPX ba foti bebé, nune'e testemuña MPX husu ajuda ba alin A mak tula testemuña MPX ho motor ba foti bebé iha haris fatin laran.

Bainhira to'o iha uma, haree bebé ne'e hatuur hela iha balde metan ida nia laran no bee nanotak nomós taka hela toalla iha bebé nia ulun. Testemuña lori halai ba klínika no bainhira doutor CBdJb koko bebé nia iis no korasaun detekta katak bebé mate ona no nia isin azul hotu. Iha 2018 arguida namora ho mane ida naran VA nomós arguida rasik hatene katak nia isin rua. Arguida nia aktu ne'ebé durante grávida la fó hatene ba nia família no ikus hodi ba partu fali iha haris fatin laran no ikus mai halakon bebé nia vida.

Prokuradór akuza arguida kotra artigu 142 KP kona ba infantisídiu ho moldura penál tinan 3 to'o tinan 10.

Produsaun ba prova sira

Iha julgamentu arguida deklara katak iha 2018 arguida ho mane ida naran VA durante fulan 6 sira hela hamutuk no halo relasaun dala barak to'o arguida grávida no fó hatene ba VA, maibé VA nonok no halai ba tiha foho, arguida tenta telefone tuir VA maibé la simu no ikus telefone mate nune'e arguida deside hodi ba hela fali iha nia família nia uma. Durante arguida grávida la fó hatete ba nia família tanba arguida sente tauk no moe tanba mane ne'e lakohi responsabiliza ba bebé ne'e. Antes ne'e testemuña AdJM no arguida nia maun Izd diskunfia arguida grafida nune'e testemuña AdJM no arguida nia maun haruka arguida atu bá óspital maibé arguida la konsege bá, arguida sente kabun no kanotak moras maka'as hanesan atu soe bee boot mak arguida ba haris fatin

no hahoris bebé ho sexu mane ho kondisaun moris hela, arguida ran fakar barak halo arguida oin halai mak tau bebé iha balde laran ho intensaun atu salva bebé maibé arguida la hatene katak iha balde ne'e bee iha ka lae., Arguida deklara katak nia laiha intensaun atu estraga bebé no durante arguida grávida la ba halo tratamentu saúde. Arguida mós deklara katak depoisde partu arguida rona duni ema bolu maibé la loke odamatan tanba arguida sente oin halai, nune'e nia maun ba tebe odamatan no lori arguida ba sentru saúde Comoro, bainhira to'o iha sentru saúde, parteira sira husu arguida la koalia buat ruma ba parteira maibé liu minutu balun foin arguida dehan katak hau foin partu no bebé tau iha balde laran no iha hela haris fatin laran. Arguida ho matan-been no deklara katak nia sente triste tanba lakon nia oan, arguida mós rekoñese katak nia hahalok ne'e la di'ak, arrepende niania hahalok no sei la komete tan iha futuru.

Testemuña MPX nu'udar arguida nia prima depoimenta katak iha momentu ne'e testemuña iha nia uma no arguidu nia inan ki'ik (Adj) husu ajuda ba testemuña MPX atu haree arguida iha haris fatin maibé testemuña MPX ta'uk no ba bolu arguida nia maun Izd no tebe odamatan nakloke mak testemuña MPX haree arguida hamri'ik fase hela ran iha nia ain no arguidu nia inan ki'ik lori lipa ba fó hatais arguida. Hafoin testemuña MPX ba bolu taxi hodi tula arguida ba sentru saúde Comoro maibé testemuña MPX la haree bebé. Testemuña MPX mós depoimenta katak bainhira sira to'o iha sentru saúde Comoro foin parteira husu bebé nia isin kompleta ka lae no husu nafatin no partera dehan atu bolu polisia mak arguida foin dehan sai katak bebé iha balde laran no iha hela haris fatin laran nune'e parteira haruka testamuña MPX ba lori bebé ba sentru saúde no testamuña MPX husu ajuda ba nia alin hodi tula testemuña MPX ba uma hodi foti bebé. Bainhira testemuña MPX ba haree bebé nia isin hatuur hela iha balde laran no bee to'o bebé nia hirus matan mak testemuña fakar tiha bee no testemuña sente ta'uk lakonsege lori bebé no testemuña ba fali sentru saúde, maibé parteira sira husu atu atu lori bebé mai iha sentru saúde, hadoin mak testemuña MPX fila fali ba lori bebé nia isin mai sentru saúde maibé to'o iha sentru saúde doutór dehan katak bebé nia iis laiha ona. Testemuña MPX mós depoimenta katak nia la nota katak arguida grávida tanba durante arguida grávida tau faru bo'ot de'it.

Testemuña CBdJP nu'udar Médiku iha Sentru saúde Comoro depoimenta katak nia iha koñesimentu kona-ba akontesementu ne'e maibé testemuña CBdJP la lembra ona bebé nia sexu. Iha momentu ne'ebá testemuña CBdJP iha sala emerjénsia no iha sala maternidade laiha médiku maibé iha parteira nain rua, nune'e testemuña CBdJP ba atende arguida no haree ran fakar no kauza husi partu nune'e haruka lori bebé ba sentru saúde. Testemuña depoimenta katak momentu ne'e feto ida mak lori bebé ba no testemuña CBdJP haree *auséncia pulso* (kakorok) nomós *pupila midriatica* (matan) katak bebé iis laiha ona no informa ba bebé nia família. Hafoin testemuña CBdJP kontaktu ba *carro funerál* hodi tula bebé nia mate isin ba uma. Testemuña CBdJP laiha

koñesimentu kona-ba autópsia nomós la lembra iha momentu ne'ebá bebé nia husar tesi ona ka seidak.

Aleinde ne'e tribunál mós lee relatóriu médiku ho lian Latina ne'ebé iha autu no testemuña halo tradusaun ba lian tetun kona-ba rezultadu "ezaminasaun ba bebé. Rezultadu ezaminasaun ne'e hatudu katak bebé ne'e tolan buat foer durante partu halo bebé dada iis la di'ak, la identifika sinal violénsia ruma ne'ebé hatudu iha bebé nia isin, bebé ho seksu mane ho isin konservada (laiha kanek ruma).

Entretantu testemuña AdJ la marka prezensa tanba oan nurak. Aleinde ne'e, prokuradór mós husu ba tribunál atu presinde testemuña sira no parte defeza laiha opozisaun, nune'e tribunál mós konkorda ho prokuradór nia pedidu hodi la rona tan testemuña sira seluk nia deklarasaun.

Alegasaun finál

Iha prosesu julagamentu, arguida deklara katak nia grávida ho mane ida (VA). Antes ne'e arguida hela hamutuk ho mane VA iha fatin seluk no depois grávida arguida ba hela fali iha nia família, durante grávida arguida la hatete sai ba família ruma no ikus bebé ne'e moris iha haris fatin laran.

Antes arguida ba haris fatin atu soe bee ki'ik, maibé bebé mak moris fali, arguida tau tun bebé ba iha balde ne'ebé ho bee nanotakno tau roupa hatais iha bebé nia leten, bebé ne'eho sexu mane. Bainhira arguida to'o óspital enfermeira husu mak foin fila ba foti fali bebé iha balde laran ho bee nanotak. Arguidu nia atitude ne'ebé fó risku ba bebé nia vida hodi partu iha haris fatin laran, tau bebé ba iha balde to'o ikus bebé lakon nia vida nune'e prokuradór haree katak arguida nia aktu ne'e priense duni rekezitu krime ne'e nian tanba antes ne'e arguida hatene nia grávida, depois mane ba tiha fatin seluk, arguida ba hela hamutuk ho nia família, ikus bebé morisno arguida husik hela iha balde laran ho bee nanotak nune'e prokuradór husu ba tribunál atu deside tuir artigu 142 KP.

Entretantu defeza deklara katak arguida konfensa deit ba faktu ne'ebé arguida komete. Arguida komete hahalok ne'e tanba mane (AV) ne'ebé halo arguida grávida la responsabiliza, arguida sente moe no ta'uk ba nia família nune'e arguida la fó hatene ba nia família kona-ba nia grávida. Alende ne'e defeza mós haktuir katak kauza husi bebé lakon nia vida ne'e la'os tanba arguida mak ho intensaun atu hamate babe, maibé tanba falta kuidadu no iha monentu ne'e bebé moris mai arguida mesak no oin halai mak tau iha balde laran, arguida mós lahatene iha balde ne'e bee iha ka, kauza husi bebé mate ne'e bele mós tanba bee ka foer ruma. defeza haree katak la'os 100% arguida nia sala maibé tanba mane la responsabiliza. Tanbá ne'e husu ba tribunál atu aplika pena suspensaun.

Desizaun

Depoisde avalia faktu sira hotu,, tribunál prova katak arguida ba haris fatin partu oan mane ida tau iha balde ho bee nanotak depois tau kalsa no toalla iha bebé nia ulun leten no tanba arguida falta kuida mak ikus rezulta bebé lakon nia vida. Tribunál konsidera faktu provadu bazeia ba arguida no testemuña sira nia deklarasaun no relatóriu médiku ne'ebé junta iha autu. Tribunál mós tetu ba sirkunstásia atenuante sira hanesan arguida foin primeiravés mai hatan iha tribunál, arrepende no promete sei la komete tan iha futuro, nune'e tribunál konklui prosesu ne'e no kondena arguida ho pena prizaun tinan tolu no suspende ba tinan haat.

7. Krime ofensa ba integridade física simples ho natureza violéncia doméstika

Nú. Prosesu : 0143/20 DIBCR
Kompozisaun Tribunál : Singulár
Juis : Dr. Evangelino Belo
Prokuradór : Dr. Luis Hernani Rangel
Defeza : Dr. Sebastião Amadio Batista
Desizaun : Pena multa US\$45.00

Iha 19 Marsu 2021 Trubunál Distritál Dili prezide julgamentu leitura sentensa ba Krime ofensa ba integridade física simples ho natureza violéncia doméstika ne'ebé envolve arguidu JdSB hasoru nia feen (separadu), iha Munisípiu Dili.

Akuzasaun Prokuradór

Prokuradór akuza katak iha 16 Setembru 2020, iha oras tuku 07:30 dadeer, arguidu uza kadeira masa ida baku iha lezada nia tilun hun no rezulta kanek no ran no mós kona labarik tanba iha momentu ne'ebá lezada ko'us hela nia oan. Arguidu nia aktu ne'ereferere rezulta lezada sofre moras no kanek iha tilun hun nomós ba halo tratamentu iha Pradet.

Antes ne'e arguidu sai ba joga to'o semana ida foin fila ba uma, nune'e lezada husu ba arguidu dehan "ó *ba ne'ebé?*", arguidu lasimu, diskute malu no mosu agresaun refere.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2(a) 3(a), 35(b) no 36 LKVD.

Produsaun ba prova sira

Iha julgamentu arguidu deklara katak faktu sira iha akuzasaun ne'e loos hotu, tanba arguidu la konsege kontrola nia-an, arguidu nervozu mak halo agresaun hasoru lezada, arguidu mós deklara katak foin primeiravés baku lezada, depoisde akontesementu hela separadu to'o agora no lezada nia família bandu atu arguidu hasoru lezada maibé

kuandu arguidu iha osan oituan arguidu ba vizita nafatin nia oan sira no fó osan ba nia oan sira.

Alende ne'e, lezada konfirma katak arguidu uza kadeira baku dala ida iha lezada nia tilun parte loos no kona sira nia oan nia kotuk laran halo rezulta labarik nia kotuk laran metan tanba iha momentu ne'ebá lezada ko'us hela sira nia oan, depoisde akontesementu lezada ba halo tratamentu iha Pradet no simu aimoruk (*ibuprofen*). Alende ne'e lezada deklara katak arguidu sai ba joga to'o semana ida foin mak tama uma nune'e lezada ho arguidu diskute malu no arguidu halo agresaun hasoru lezada. Lezada mós deklara katak arguidu foti ema nia bibi no hasai tiha husi nia serbisu (hanesan membru F-FDTL), nune'e lezada sente moe no lakohi atu fila ba moris hamutuk ho arguidu hanesan feen ho la'en.

Aleinde ne'e tribunál decide hodi la rona tan testemuña sira nia deklarasaun tanba arguidu konfesa integralmente ba faktu sira iha akuzasaun no lezada mós konfirma.

Alegasaun finál

Prokuradór haktuir katak arguidu konfesa ba faktu sira iha akuzasaun, responsabiliza nafatin ba nia oan sira no lezada konfirma, depoisde akontesimentu hela separadu, lezada mak sente liu husi arguidu nia aktu ne'e no lezada lakoi atu perdua arguidu, prokuradór haree ba krime ne'e grave oituan tanba arguidu baku ho kadeira dala ida, prokuradór apresia ho arguidu nia aktu ne'ebé mezmu hela separadu ona maibé arguidu ba vizita no nafatin responsabiliza ba nia oan sira, nune'e prokuradór husu ba tribunál atu kondena arguidu ho pena multa tuir arguidu nia kapasidade.

Entretantu defeza husu ba tribunál atu aplika pena admoestasaun ba arguidu tho konsiderasaun arguidu konfesa integralmente ba sira faktu hotu, lezada mós konfirma katak loos duni dala ruma arguidu fó osan ba lezada maibé sempre mosu problema, arguidu responsavel nafatin ba nia oan sira no foin primeiravés mai hatan iha tribunál.

Desizaun

Depoiasde avalia faktu sira hotu, tribunál prova katak arguidu komete duni krime hasoru lezada. Arguidu lori kadeira masa ida baku iha lezada nia tilun hun no iha momentu ne'ebá lezada ko'us hela sira nia oan nune'e kadeira ne'e kona mós ba sira nia oan, tribunál mós tetu sirkunstánsia atenuante sira hanesan arguidu arrepende niania hahalok, foin primeiravés mai hatan iha tribunál, arguidu nafatin nia responsabilidade nu'udar aman, nune'e tribunál konklui prosesu ne'e no kondena arguidu ho pena multa US\$45.00, ne'ebé sei selu US\$0.50 kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

8. Krime falsifikasaun dokumentu ka notasaun téknika no falsifikasaun agravada

Nú. Prosesu

: 0096/17 PGGCC no 0019/18 PGGCC

Kompozisaun Tribunál : Koletivu
Juis : Dra. Ana Paula Fonseca, Dr. Ivan José Suritay P.
AGonçalves no Dra. Maria Solana
Prokuradór : Dr. Rogerio Viegas
Defeza : Dr. João de Carvalho, Dr. Juvinal Yanes no Dr. Manuel
Amaral
Desizaun : Pena prizaun tinan 2 fulan 8 suspende ba tinan 3 fulan 6,
pena prizaun tinan 3 suspende ba tinan 4, pena prizaun tinan 2 fulan 6 suspende ba
tinan 3 no pena prizaun tinan 2 suspende ba tinan 2 fulan 6.

Iha 26 Marsu 2021, Tribunál Distritál Dili prezide julgamentu leitura akordaun ba krime falsifikasaun dokumentu ka notasaun téknika no falsifikasaun agravada ne'ebé envolve arguida Josefina Domingas de Carvalho Exposto nu'udar funsionáriu iha administrasaun Igreja Parokia Balide, arguida Sabina Lourdes nu'udar katekista iha bairo Quintal Boot, arguidu Jacob Taul Abi nu'udar sakristaun iha Igreja Parokia Balide no arguidu António Ramos, iha Munisípiu Dili.

Akuzasaun Prokuradór

Prokuradór akuza katak Arguidu António Ramos moris no sarani iha 20 Dezembru 1993, maibé iha 2014 arguidu Antonio Ramos ba trata fali ninia sertidaun batizmu no ninia inan-aman nia sertidaun kazamentu liuhusi arguida Sabina Lourdes tanba tuir informasaun husi Sr. Andre da Costa ne'ebé sei iha relasaun família ho arguidu António Ramos nia aman hatete katak arguida Sabina Lourdes trata ema barak nia sertidaun batizmu iha Parokia Balide. Tanba ne'e, iha Dezembru 2014, arguidu António Ramos ho nia bin Agostinha Ramos lori ninia dokumentu sira hanesan arguidu nia sertidaun batizmu, arguidu nia inan-aman nia sertidaun batizmu no sertidaun kazamenu lori ba entrega iha arguida Sabina Lourdes nia uma iha Quintal-boot ho objetivu atu trata pasaporte no billete identidade Portugal nian hodi ba buka serbisu iha Inglaterra. Bainhira arguidu Antonio entrega kopia dokumentu sertidaun tahan haat ne'e ba arguida Sabina Lourdes, arguida Sabina husu ba arguidu António Ramos atu selu kada sertidaun ida ho presu US\$100.00, nune'e arguidu António Ramos selu hotu kedas sertidaun haat nian ho montante osan US\$400.00 no arguida Sabina Lourdes mós promete ba arguidu Antonio Ramos katak "*hein de'it, hau kontaktu mak mai foti sertidaun hirak ne'e*".

Antes arguidu Antonio lori sertidaun ba arguida Sabina Lourdes nia uma, arguida Sabina Lourdes kontaktu uluk ba arguida Josefina Exposto hodi konfirma katak iha parokia Balide bele trata dokumentu ba ema sira ne'ebé la sarani no la kazamentu iha parokia Balide nia sertidaun batizmu no sertidaun kazamentu no arguida JDdCE responde dehan katak "*bele, dalan iha, hau mak trata, maibé sertidaun haat ne'e nia folin US\$200.00*" (sertidaun tahan ida selu US\$50.00) no arguida Sabina mós konkorda

ho presu ne'e, nune'e iha momentu ne'ebá arguida Sabina Lourdes lori sertidaun batizmu 3 no sertidaun kazamentu husi arguidu Antonio Ramos entrega ba arguida Josefina Exposto no entrega mós ho osan US\$200.00 no US\$200.00 hela ho arguida Sabina Lourdes no iha momentu ne'eba, arguida Josefina Exposto promete ba arguida Sabina Lourdes katak semana ida mak mai foti fali iha kartoriu parokia Balide.

Depoide simu tiha sertidaun batizmu arguidu Antonio Ramos, Artur Ramos no Veronica da Costa (arguidu António Ramos nia inan no aman) nian no sertidaun kazamentu Artur no Veronica nian ho osan US\$200.00, arguida Josefina Exposto komesa halo no emite sertidaun sira ne'e, uza ema seluk ninia número asentu hanesan 222/1994 ne'ebé la'os arguidu Antonio nian maibé nú asentu ne'e ema ida naran Rui Anastacio Amaral da Silva nian. Nú. asentu 118/1989 la'os sertidaun husi Artur Ramos nian maibé nú. asentu ema seluk ida nian ho naran Miguel Soares nian, sertidaun kazamentu ho nú. asentu 116/1989 ne'e la'os Artur Ramos no Veronica dC nian maibé ema kazal naran Agapito Martins no Lourença dC Ribeiro nian ne'ebé kaben iha 06 Outubru 1989. Hafoin liu tiha semana ida, arguida Sabina Lourdes ba foti sertidaun falsu sira ne'ebé trata husi arguida Josefina Exposto kartoriu parokia Balide ne'ebé hetan asinatura husi Amu Parokia Balide Pe. Adriano Ximenes. Arguida Sabina Lourdes kontaktu ba arguidu Antonio Ramos atu foti sertidaun sira ne'ebé trata tiha ona husi arguida sira, maibé tanba momentu ne'ebá arguidu Antonio sei iha hela Iliomar mak arguidu Antonio Ramos husu ajuda ba nia bin Agostinha Ramos ba foti sertidaun sira ne'e iha arguida Sabina Lourdes nia uma (Quintal Boot).

Iha loron ne'ebé la apura maibé iha Setembru 2015, lezadu Acacio Manuel Moniz lori dokumetu hanesan kartaun Eleitoral no sertidaun RDTL ba arguida Sabina Lourdes nia uma hodi husu ajuda atu trata nia sertidaun batizmu, nia inan-aman nia sertidaun batizmu no sertidaun kazamentu. Objetivu lezadu trata nia sertidaun batizmu, nia inan-aman nia sertidaun batizmu no sertidaun kazamentu ne'e atu bele hetan pasaporte no Billete Identidade Portugal nune'e bele ba buka serbisu iha Irlandia. Iha loron ne'ebé la apuradu maibé fulan hanesan arguida Sabina hatete ba lezadu atu kontaktu ba nia inan-aman hodi husu kona-ba lezadu nia data sarani, lezadu nia inan-aman sarani, data lezadu nia inan-aman kazamentu no nia avó sira nia naran.

Iha loron ne'ebé la apura, lezadu kontaktu ba nia inan-aman no hakerek hotu dadus ne'ebé arguida Sabina Lourdes husu hodi entrega ba arguida Sabina Lourdes. Iha loron ne'ebé hanesan, arguida Sabina Lourdes husu osan US\$600.00 ba lezadu atu trata lezadu nia sertidaun batizmu, lezadu nia inan-aman nia sertidaun batizmu no sertidaun kazamentu, nune'e lezadu entrega duni osan US\$600.00 ba arguida Sabina Lourdes. Arguida simu osan refere no fó hatete ba lezadu katak hein de'it depois kontaktu mak ba foti.

Iha loron ne'ebé la apura, maibé entre Setembru ka Outubru 2015, arguida Sabina Lourdes entrega lezadu ho lezadu nia inan-aman nia identidade ba arguida Josefina Exposto no entrega mós osan ho montante US\$200.00 (kada sertidaun selu US\$200.00). Arguida Josefina Exposto simu tiha surat ne'ebé hakerek lezadu Acacio no nia inan-aman sira nia identidade, imediatu prepara formuláriu hodi priense sertidaun batizmu ba lezadu no nia inan-aman maibé dados refere la tama iha livru asentu Parokia Balide. Arguida Josefina entrega tutan formuláriu ne'ebé priense ona ba arguidu Jacob Taul Abi no ketik iha komputadór depois *print out* sertidaun sira ne'e entrega fali ba arguida Josefina Exposto no entrega fali ba amu Parokia Balide hodi asina. Depoisde amu Parokia asina sertidaun sira ne'e, fó fali ba arguida Josefina Exposto hafoin kontinua entrega ba arguida Sabina Lourdes no entrega tutan ba Sr, Acacio (lezadu). Durasau tempu prosesu husi inisiu lezadu entrega ba arguida Sabina Lourdes to'o lezadu simu fali sertidaun maizumenus semana ida ho balun.

Konsekuensia husi arguidu sira nia aktu iha leten hodi produs sertidaun falsu ne'e, espesifikamente hamonu dignidade igreja hanesan instituisaun relijiaun no estadu RDTL hanesan nasaun.

Prokuradór akuza arguidu nain tolu (Josefina Domingos de Carvalho Exposto, Sabina Lourdes no António Ramos) kontra artigu 303 nú 1(a) KP kona-ba falsifikasaun dokumentu ka notasaun téknika no artigu 304 nú 1 KP kona-ba falsifikasaun agravada no arguidu Jacob Taul Abi kontra artigu 304 KP kona-ba falsifikasaun agravada.

Produsaun ba prova sira

Iha julgamentu arguida Josefina Exposto deklara katak faktu iha akuzasaun ne'e loos duni tanba ne'e mak husu ba tribunál atu decide, arguida Josefina Exposto mós deklara katak iha momentu ne'ebá ema barak mak ba trata sertidaun no ema nain rua de'it mak atende, nune'e arguida simu kopia no la haree iha livru asentu tanba iha kopia antes ne'e iha número asentu mak arguida halo tuir de'it, arguida Josefina mós deklara katak nia la konfirma sertidaun sira ne'e, nune'e nia la hatene sertidaun sira ne'e loos ka lae tanba arguida Joxefina Exposto okupadu ho serbisu barak no mós lahatene lezadu entrega nia dokumentu ba arguida Sabina Lourdes. Arguida Josefina Exposto mós deklara katak nia simu dokumentu hotu-hotu husi arguida Sabina Lourdes tanba arguida Sabina Lourdes nu'udar sarani Parokia Balide nian no dokumentu ne'ebé arguida Sabina Lourdes entrega ne'e iha mós *karimbu no logo* igreja Balide nian. Arguida Josefina deklara mós katak antes ne'e ema seidauk barak mak ba trata dokumentu no mós seidauk rejistu iha sistema nune'e arguida sempre verifica dokumentu sira maibé desde 2006 arguida la verifica ona dokumentu sira tanba iha ona ema barak mak trata dokumentu no rejistu ona iha sistema. Arguida Josefina Exposto deklara mós katak nia nunca husu osan iha arguida Sabina Lourdes. Arguida Josefina mós deklara katak arguida foin primeiravés simu osan ho montante US\$200.00, ne'ebé Sr. Acacio (lezadu) entrega ba arguida Sabina depois arguida Sabina Lourdes entrega

ba arguida Josefina Exposto. Arguida Josefina Exposto mós deklara katak normalmente arguida lori dokumentu sira ba amu nia fatin mak amu asina, bainhira iha oras sai serbisu arguidu rai deit iha amu nia meza leten no amu asina tiha mak foin arguida entrega fali ba nain.

Arguida Sabina Lourdes deklara katak faktu sira iha akuzasaun ne'e loos hotu, arguida Sabina sai katekista desde 1994, iha 2015, arguidu Antonio Ramos no lezadu Acacio Manuel Moniz ba iha arguida Sabina Lourdes nia uma hodi husu ajuda mak arguida Sabina Lourdes kontaktu ba arguida Josefina hodi konfirma no arguida Josefina Exposto dehan bele mak arguida Sabina Lourdes lori dokumentu no osan ho montante US\$ 200.00 tau iha envelope hodi entrega ba arguida Jasefina Exposto, depois arguida Josefina Exposto fó formuláriu tahan ualu (arguidu Antonio Ramos priense formulariu tahan 4 no lezadu Acacio Manuel Moniz priense formulariu tahan 4) hodi arguida Sabina Lourdes ho arguidu António Ramos no lezadu Acacio Manuel Moniz ba priense sira nia naran no data moris maibé kona-ba número asentu arguida Sabina Lourdes la hatene. Depoisde priense tiha formuláriu sira ne'e, arguida Sabina Lourdes entrega fali formuláriu ne'e ba arguida Josefina Exposto no depoisde semana ida foin arguida josefina kontaktu fali ba arguida Sabina Lourdes hodi entrega dokumentu sira ne'ebé nia trata hanesan sertidaun batizmu no sertidaun kazamentu. Arguida Sabina Lourdes mós deklara katak arguidu Antonio Ramos fó sertidaun haat no osan US\$400.00 no lezadu Acacio Manuel Monizfo sertidaun tahan 4 ho osan US\$600.00, arguida hatene katak sarani ne'ebé husi parokia seluk labele trata iha parokia Balide maibé arguida Sabina Lourdes ajuda hodi trata dokumentu sira tanba sira atu ba serbisu iha estranjeiru no tanba sira mós sei iha relasaun família. Arguida Sabina Lourdes mós deklara katak normalmente trata sertidaun uruzenti mak US\$10.00 no trata normal mak US\$5.00.

Alénde ne'e, arguidu Jacob Taul Abi hili ninia direitu nonok. Entretantu arguidu António Ramos deklara katak faktu balu loos no balu la loos, arguidu mós deklara katak lora no fulan ne'ebé la apura maibé iha 2014, arguidu ba tarata duni sertidaun batizmu iha Igreja Parokia Balide maibé arguidu la ba direktamente, arguidu António Ramos entrega nia dokumentu sira ba iha arguida Sabina Lourdes mak ba trata tanba se kuandu arguidu António Ramos ba trata nia sertidaun iha Iliomar ne'e dook no presiza tempu ne'ebé naruk no iha momentu ne'eba arguidu fó ho osan US\$ 400.00, tanba arguidu entrega dokumentus haat, mak hanesan arguidu nia sertidaun Batizmu, Arguidu nia inan- aman nia sertidaun batizmu no sertidaun kazamentu no kada sertidaun ida arguidu selu ho osan US\$100.00. Arguidu António Ramos mós deklara katak arguidu rasik mak ba entrega nia dokumentu sira ba iha arguida Sabina Lourdes, maibé bainhira sertidaun prontu tiha, arguidu António Ramos nia bin Agostinha Ramos mak ba foti sertidaun sira ne'e. Arguidu António Ramos mós deklara katak iha momentu ne'ebá,

arguidu sei iha nivel edukasaun sekundário nune'e arguidu António Ramos seidak hatene katak nia aktu ne'e kontra lei.

Testemuña Cecilio dos Santos nu'udar funsionáriu iha Igreja Balide depoimenta katak, nia servisu tinan barak ona iha Igreja Parokia Balide, bainhira sarani ida moris ka simu sakramentu batizmu iha Parokia seluk ne'ebé la partensia ba iha Parokia Balide nian, laiha autorizasaun ba renova dokumentus ka trata sertidaun saída de'it, esepu ba sarani ne'ebé mak simu sakramentu batizmu iha Parokia Balide rasik mak bele trata sira nia dokumentu iha parokia Balide. Testemuña Cecilio dos Santos mós depoimenta katak bainhira sira prodús dokumentu ruma relasiona ho sertidaun batizmu, sertidaun kazamentu no sertidaun óbitu, testemuña la verifika tan iha livru arkaivamentu tanba sarani sira barak liu no dala ruma testemuña simu dokumentu sira 50, ou bele to, o 100, se kuandu testemuña verifika iha livru asentu mak foin prodús kada sertidaun bele han tempu ne'ebé naruk no arguida Sabina Lourdes nia serbisu mak halo verifikasaun ba dokumentu sira.

Testemuña Pe. AX nu'udar eis Pe. Paroku iha Parokia Balide depoimenta katak kuñese arguida no arguidu sira (Josefina Domingas de Carvalho Exposto, Sabina Lourdes no Jacob Taul Abi) hanesan sarani husi parokia Balide nian no testemuña Pe. AX nu'udar Padre Paroku iha Parokia Balide nian iha 01 Dezembru 2013 to'o iha 03 Marsu 2019. Testemuña Pe. AX mós depoimenta katak regra atu trata sertidaun batizmu ka sertidaun kazamentu kuandu trata normal mak sei selu US\$ 5.00 no trata urjente mak sei selu US\$10.00 no atu trata sertidaun batizmu no sertidaun kazamentu sei lori sédula hodi konfirma iha livru asentu, kuandu sarani ida atu renova sertidaun batizmu ka sertidaun kazamentu tenki lori sertidaun tuan nian, maibé ahi han ka lakon sei lori sédula, bainhira sedula mós lakon tenki halo rekerimentu ba iha dioseje depois husi dioseje sei haruka karta ba fali paroku foin mak trata dokumentu sira ne'e. Testemuña Pe. AX mós depoimenta katak sarani ida ne'ebé sarani iha parokia seluk tenki hasai sertidaun iha parokia ne'ebé mak nia sarani ba tanba parokia hotu-hotu halo renovasaun. Testemuña Pe. AX mós depoimenta katak ema ne'ebé responsável atu trata sertidaun batizmu no kazamentu mak arguida Josefina Exposto, arguidu Jacob Taul Abi no testemuña Fernanda do Risario da Cruz. Testemuña Pe. AX mós depoimenta katak arguida Josefina Exposto mak akumulá hotu osan no iha fin du més mak foin entrega ba testemuña, kuandu sarani ruma nia número asentu la loos labele hasai sertidaun no dala ruma lapsu husi funsionáriu sira mak hakerek sala número asentu ne'e, testemuña Pe. AX depoimenta katak la hatene kazu falsifikasaun ne'e primeiravés ka bebeik ona no tanba serbisu barak nomós depozitu ona konfiansa ba arguida Josefina Exposto nune'e arguida sira trata hotu lori ba iha testemuña Pe. AX no testemuña husu mak konfirma ona ho livru asentu no loos ona foin testemuña asina. Kuandu arguidu sira mak falsifika dokumentu ka lae ne'e sira nia kulpa, tribunál mós konfirma ba testemuña kona-ba número asentu iha autu la hanesan ho livru asentu maibé kopia livru asentu ne'e parokia Balide nian.

Testemuña Fernanda do Rosario da Cruz nu'udar funsionáriu iha Igreja Parokia Balide depoimenta katak nia hanesan funsionáriu ida dala ruma fó atendumtu ba ema sira ne'ebé atu trata sertidaun, testemuña Fernanda do Rosario da Cruz depoimenta katak nia laiha koñesimentu kona-ba arguidu Antonio Ramon no Sr. Acacio Moniz trata sira nia sertidaun iha igreja Balide, testemuña Fernanda do Rosário da Cruz mós depoimenta katak normalmente sarani sira atu renova sertidadun batizmu ka sertidaun kazamentu tenki lori sertidaun nia kopia ba depois verifika iha livru asentu loos ona foin *print* no kuandu sarani simu sakramentu batizmu iha parokia seluk labele ba trata sira nia sertidaun iha Parokia Balide nomós testemuña laiha koñesimentu kona-ba arguida Sabina Lourdes iha ka laiha kompetensia atu trata sertidaun.

Alegasaun final

Prokuradór haktuir katak arguidu António Ramos konfesa ba faktu katak arguidu António ramos ho nia bin lori sertidaun Batizmu no sertidaun Kazamentu ba fó arguida Sabina Lourdes no entrega mós osan US\$ 400.00 atu trata sertidaun batizmu no sertidaun kazamentu mezmú arguidu Sarani iha Iliomar no nia inan-aman kazamentu iha Iliomar.

Arguida Sabina Lourdes konfesa integralmente ba faktu katak loos duni simu duni sertidaun batizmu no sertidaun kazamentu no osan US\$400.00 husi arguidu António Ramos nomós sertidaun batizmu no sertidaun kazamentu ho osan US\$ 600.00 husi Sr. Acacio, arguida Sabina Lourdes kontaktu ba arguidua Josefina Exposto no lori dokumentu sira ne'e no osan US\$200.00 hodi ba enterega iha arguida Josefina Exposto.

Arguida Josefina Expostu konfesa katak faktu loos duni tanba ne'e mak husu ba tribunál atu deside no dokumentu ne'ebé mak arguida Josefina simu, nia rasik mak entrega ba arguidu Jacob Tau Abi.

Entretantu arguidu Jacob Taul Abi hili nia direitu nonok, maibé ho arguida Sabina Lourde no arguida Josefina nia deklarasaun hatudu katak loos duni arguidu Jacob Taul Abi mós komete duni. Rona testemuña sira mai depoimenta katak tuir orientasaun dioseze nian katak sarani ne'ebé mak la sarani iha parokia Balide labele atu trata nia dokumentu ruma iha parokia refere.

Alegasaun final

Bazeia ba prova ne'ebé produs iha audensia hatudu katak arguidu/a sira nia aktu priense duni element husi krime falsifikasaun, tanba arguidu/a sira rasik konfesa katak produs dokumentu falsu hanesan sertidaun falsu, depoisde haree faktu no prova sira iha audénsia julgamentu hatudu katak arguidu sira komete duni faktu sira ne'ebé prokuradór akuza ba sira nune'e husu ba tribunál atu kondena kada arguidu/a ho pena

prizaun tinan 3 suspende ba tinan 5 no kona-ba osan ne'ebé arguidu/a sira uza hodi fasilita prosesu falsifikasaun hamutuk US\$1,000.00, nune'e prokurador rekere ba tribunál atu deklara osan refere hanesan objeitu, nune'e bele afavor ba konfre estadu nian no husu atu kada arguidu selu taxa judisíaria US\$20.00.

Entretantu parte defeza husi arguida Josefina Expostu no arguidu Jacob Taul Abi husu atu tribunál tetu ba faktu no foti desizaun ne'ebé mak justu ba arguida Josefina tanba arguida konfesa parsial ba faktu katak iha momentu ne'ebá arguida simu duni dokumentu, arguida Sabina Lourdes no sarani sira atu renova sertidaun, tuir loloos tenki halo verifikasaun mezmua ema barak no tenki haree sarani husi parokia seluk labela atu prosesa nia dokumentu iha parokia Balide, kona-ba arguidu Josefina Expostu mós simu osan ne'e arguida la husu maibé sarani sira mak fó deit, parte defeza entende katak mezmua ema barak mak ba trata nia dokumentu maibé tuir loloos arguida tenki haree dokumentu ida-idak tanba dokumentu barak ne'e laos razaun ida, depoisde arguida Josefina Exposto entrega ba iha arguidu Jacob Taul Abi depois arguidu Jacob Tau Abi entrega ba amu Paroku asina no arguidu Jacob Taul Abi hili nia direitu nonook.

Aleinde ne'e defeza husi arguida Sabina Lourdes husu ba tribunál atu halo alterasaun ba kualifikasau jurídiku husi artigu 304 KP kona ba falsifikasaun agravada ba fali artigu 303 (a) KP kona-ba falsifikasaun dokumentu ka notasaun téknika karik tribunál iha hanoin seluk mak parte defeza husu pena ne'ebé adekuaudu no proporsionál tanba arguida deklara katak iha momentu ne'ebá arguida simu duni dokumentu no osan husi arguidu António Ramos ho intensaun atu ajuda trata arguidu António Ramos nia sertidaun, testemuña sira mós mai konfirma katak tuir loloos labele simu no trata sarani ne'ebé mak husi parokia seluk, no ema ne'ebé produs sertidaun sira ne'e mak arguida Josefina Exposto laos arguida Sabina Lourdes nune'e parte defeza entende katak arguidu Sabina Lourdes laos ko-autoria maibé komplisi ba falsifikasaun dokumentu ka notasaun téknika.

Aumezmu tempu defeza husi arguidu Antonio Ramos husu ba tribunál atu absolve arguidu Antonio Ramos karik tribunál iha hanoin seluk mak parte defeza rekere tuir artigu 303 (a) KP tanba parte defeza husi arguidu Antonio Ramos la merese ba iha artigu 304 KP tanba arguidu Antonio Ramos deklara katak nia halo duni kontaktu ho arguida Sabina Lourdes no arguida dehan presiza mós osan no ikus arguidu Antonio Ramos fó duni osan no ikus arguida Sabina Lourde lori ba iha parokia Balide, tanba konfiansa mak arguidu António Ramos ba iha arguida Sabina Lourdes nia uma no entrega nia dokumentu no osan ba arguida Sabina Lourdes, arguidu António Ramos sarani iha lliomar no tempu limitadu mak la konsege ba lliomar trata dokumentu sira. Kona-ba falsifikasaun ne'e arguida Josefina Exposto mak bele hatene normalmente trata dokumentu no nú asentu, nune'e parte defeza entende katak arguidu António Ramos inosente.

Palavra ikus husi arguidu/a sira simu buat ne'ebé sira halo ona no promete sei la komete tan iha futuru.

Tribunal halo alterasaun la-substansiál konabá faktu iha akuzasaun katak: arguida Sabina Lourdes hela ho osan restu US\$200.00, ne'ebé simu husi arguidu Antonio Ramos, Presu ba trata sertidaun apenas US\$10.00 ba trata sertidaun urjente no US\$5.00 ba trata sertidaun normal, nú. Asentu 210/ 1980 ne'e la koresponde ho arguidu António Ramos nia inan Sra. Varonica dC ne'ebé mak la existe iha livru asentu Parokia Balide nian, arguidu Josefina Domingas de Carvalho Exposto prenze formulariu sira ho nú. asentu hanesan (nú asentu 532/1998 identifika ho lezadu Acacio Manuel Moniz nian ne'e la exizte, nú asentu 187/1971 ne'e nú. asentu sra. Alice Nogueira nian ne'ebé mak inventa hodi tau fali sra. Joana Pinto nia naran inan husi Acacio Manuel Moniz, nú asentu 537/1987 ne'e nú. asentu sr. Cesário Lu Ximenes nian ne'ebé mak inventa hodi tau fali Sr. Estevão Moniz nia naran aman husi husi lezadu Acacio Manuel Moniz) no konduta husi arguidu sira nia konduta ne'e governu Português kansela sidadun Timorensé ne'ebé mak husu atu sai sidadaun Portuguesa.

Desizaun

Depoizde avalia faktu hotu ne'ebé prodús durante julgamentu, tribunál bazeia ba konfesaun husi arguidu/a sira, liu-liu arguida Josefina Exposto no arguidu Jacob Taul Abi iha momentu hatu'ó última deklarasaun nomós dokumentu sira ne'ebé junta iha autu laran, nune'e tribunál prova katak arguida Sabina Lourdes simu sertidaun batizmu no sertidaun kazamentu ho osan US\$400.00 husi arguidu António Ramos nomós sertidaun batizmu no sertidaun kazamentu ho osan US\$600.00 husi Sr. Acacio moniz, arguida Sabina Lourdes kontaktu ba arguidu Josefina Exposto no lori dokumentu sira ne'e no osan US\$200.00 hodi ba entrega iha arguida Josefina Exposto no arguida Josefina Exposto imediatu prepara formuláriu hodi priense sertidaun batizmu ba Sr. Acacio Maniz no arguidu António Ramos ho sira nia inan-aman maibé dados refere la tama iha livru asentu Parokia Balide. Arguida Josefina entrega tutan formuláriu ne'ebé prenze tina ona ba arguidu Jacob Taul Abi hatama ba komputadór depois *print out* sertidaun sira ne'e entrega fali ba arguida Jasefina Exposto mak entrega fali ba amu Parokia Balide asina. Depoizde amu Parokia asina sertidaun sira ne'e, fó fali ba arguida Josefina Exposto hafoin kontinua entrega ba arguida Sabina Lourdes no entrega tutan ba Sr, Acacio Moniz no arguidu António Ramos.

Tribunál tetu mós ba sirkunstánsia atenuante sira hanesan arguidu no arguida sira foin primeiravés mai hatan iha tribunál, arrepende sira nia hahalok no promete sei la komete tan iha futuru. Nune'e tribunál konklui prosesu ne'e hodi kondena arguida Sabina Lourdes ba krime falsifikasaun rua no tribunál aplika pena únika mak pena prizaun tinan rua fulan ualu, suspende ba tinan tolu fulan neen. Kondena arguida Josefina Domingas de Carvalho Exposto ba krime falsifikasaun rua, tribunál aplika pena únika mak pena

prizaun tinan tolu suspende ba tinan haat. Kondena arguidu Jacob Taul Abi ba krime falsifikasaun rua, tribunál aplika pena únika mak pena prizaun tinan rua fulan neen suspende ba tinan tolu no kondena arguidu António Ramos ho pena prizaun tinan rua suspende ba tinan rua fulan neen. Alende ne'e, tribunál mós sei komunika ba iha Parokia Balide atu nune'e Parokia Balide no Dioseze bele tau konsiderasaun ba arguidu sira nia aktu refere.

Atu hetan informasaun liutan bele kontaktu:

Ana Paula Marçal

Diretora Ezekutiva JSMP

Email: ana@jsmp.tl

Telefone: 77040735

Website: <https://jsmp.tl/>